

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 71, No. 1425

原始資料: CBETA 人工輸入, 蔡寧君大德輸入

## No. 1425-A 丹霞淳禪師語錄序

我宗無語句。亦無一法與人。然於無法之中而立五位三玄之法。於無語之中而作呵佛罵祖之說。雷砰電射。魔外不能窺。海湧雲屯。龍宮不得藏。然未嘗始涉唇吻立文字矣。能具此機宏唱五位君臣之法。橫說豎說如轉圓石於千仞之上。不留其蹤者丹霞淳禪師是也。茲 師遠裔良機。恐其語錄歲久湮沒。依舊本參考訂正一新。繡梓以永流播。因問序於余。不以不文辭。而謹書之以冠卷首。庶幾後學之輩別須具眼子細看取。切勿向語言文字求解會焉。

旨寶永庚寅孟陬下澣 萬山(祖緣)拜手敬題

## No. 1425

### 丹霞子淳禪師語錄

#### 丹霞淳禪師語錄目次

卷上序

大洪山上堂法語

真贊

偈頌

卷下增輯上堂法語

舉古

頌古

### 隨州大洪山淳禪師語錄

嗣法小師 慶預 校勘

師於政和五年九月二十五日在唐州大乘山慧照菴受隨州大洪請。拈疏云。還會麼。驪珠未剖價難酬。灼爍寒光映碧流。罔象未能知去處。更憑子細說端由。讀疏罷。師陞座示眾云。好諸禪德。蕭索茅菴草亂埋。柴扉日午尚慵開。冥然獨坐枯根上。孰謂殊恩雲外來。遂置金雞報曉重明少室之玄旨。石女謳歌再唱新豐之妙曲。直得千山擁瑞萬卉呈祥。八方道泰時康。一國河清海晏。諸人還會麼。正當霜桂花開夜。又是蟠桃結實時。

入院上堂云。危巒蕭灑古禪宮。信步重歸趣無窮。風卷白雲天界淨。一輪紅日正當空。

當日知事請小參云。銀臺燃鳳燭。燄照虛堂。寶閣扣金鐘。聲騰空界。於是慧光無間冥通先佛之妙心。雅梵喧轟潛運祖師之密旨。識情未盡舉目皆差。根境頓忘殊途一致。若能如是。始解帶角披毛。雖然恁麼。大洪拄杖猶未肯在。敢問諸人。且道拄杖子別有甚麼長處。良久云。天教生在千峰上。穩密盤根勢未休。

上堂云。曉風吹散碧天雲。日上長空景象分。寂照含虛無內外。當明一句若為論。所以道一句子當明不當照。一句子當照不當明。一句子明暗混融。一句子不落明暗。四句中且道那一句為賓那一句為主。若也委悉得去。便乃行脚事畢。苟或未然。萬古碧潭空界月。再三撈攏始應知。

冬夜小參。好諸禪德。金鐘雖韻。星月未分。假燈燭為光明。仗聲塵為佛事。於是熒煌交映音韻相和。迥出見聞。遐超聲色。所以道欲識解脫道。諸法不相到。眼耳絕見聞。聲色闊浩浩。諸人若也於斯委悉得去。可謂如龍得水似虎依山。苟或未然。不免他旋轉。大洪今夜不惜眉毛為諸人說破。耳界聞時眼界通。一根旋返六圓融。欲知佛祖虛明地。妙在聲香味觸中。

冬節上堂。山上今冬少陰雪。晴和天氣如春月。斯辰又喜一陽生。梅根占得先開發。欲知佛性義。諦觀時節。正當林木凋疏天地寒冽。且道一陽從什麼處生。諸人還會麼。要知陽氣潛興處。直向金剛際下看。其或未然。節辰已過。伏惟起居萬福。

臘八上堂。屈指忻逢臘月八。釋迦成道是斯辰。二千年後追先事。重把香湯浴淨身。諸禪德。古有十六開士。因僧浴時隨例入室。忽悟水因。洞明妙觸。盡入圓通境界。大洪今日普請往靈濟殿上灌沐釋迦如來。箇中亦有悟底消息。諸人還會麼。香湯漱灑兩三杓。便向如來頂上傾。

除夜小參。今夜年窮歲盡。來辰改旦迎春。光陰倏忽不饒人。齒髮衰殘又添歲。大眾。光陰遷謝。念念無常。時不待人。命焉得久。人人盡知今日是臘月三十日。還曾準備得今日事麼。諸人莫作等閑。直得切切準備他始得。且道作麼生準備。莫是聚集財物為準備。莫是看閱經教為準備。莫是念禪策子為準備。莫是持機巧心為準備。正當恁麼時。眼光落地手脚忙亂。從前記得一時忘了。到這裡直須腳踏實地始得。用掠虛不得也。諸人時中快須休歇去。準備他去。把今時事放盡去。向枯木堂中冷坐去。切須死一偏去。却從死裡建立來。一切處謾你不得。一切處轉你不得。一切處得自在去。所以道懸崖撒手自肯承當。絕後再甦相欺不得。若能如是。可謂旋嵐偃嶽而常靜。江河競注而不流。野馬飄鼓而不動。日月麗天而不周。其或未然。祇知事逐眼前過。不覺老從頭上來。

元旦陞座。正氣回春。東君扇物。向無生中生成萬有。於無住本建立諸緣。情與無情咸承恩力。是以夜明簾外君臣慶賀於茲時。枯木岩前父子歡呼於此日。諸禪德。祇如野老門下又復如何。良久云。還會麼。兒孫俱得力。室內不知春。

上堂拈起拂子云。大洪拂子拈起則春光妍媚萬木含芳。放下則寸艸不生普天一色。然雖恁麼。子細觀來猶是時人窠窟。此二途如何履踐。良久云。還會麼。但得春風和暖。自然背陰花開。

師於天寧萬壽禪寺上堂祝香云。伏願  
皇帝陛下。二儀同壽生成萬物而無為。三光共明照燭十方而不間。

遂陞座示眾云。三德齊敷結淨緣。十方僧寶世良田。願將此日無為福。上祝 皇圖億萬年。於是瑠璃殿瑩君臣會合而一氣連枝。明月堂深父子相逢而同身共命。相將行處玉堦寒蘚蒙茸。携手歸時碧嶂白雲繚繞。通身及盡不當機。信步回途無異路。所以從無住本立一切法。經行坐臥常在其中。語默動容不離當處。諸人還會麼。十方國土無佗境。四海歡謠奉一人。即將此日舉揚般若大會殊因。謹用上嚴  
今上皇帝陛下。伏願道齊五帝福邁諸天。位居北極之崇。壽等南山之固。次願知府大夫通判大夫郡縣文武賢僚。德祐民瘼。風傳去獸之威。才入聖眸。夢應非熊之兆。

上堂云。好諸禪德。夫為如來之子。宜各以道為務。直須洗滌根塵。遂使三業清淨。於圓明正念而念念無差。方能入道脫離生死。苟或未然。貪著空華衣。失却壤生袴。臘月三十日手忙腳亂去。奉勸諸禪流。得坐自迴顧。

結夏上堂云。安居三月。以大圓覺為我伽藍實相住持。禁足九旬。具平等智護生履道饒益有情。然雖恁麼。更須知有一人不安居守制。不履道護生。諸人還識得麼。苟或未然。不免重為宣說。佛祖從來不奈伊。滿頭明月去還歸。雖然六戶無親識。今古何曾更間違。

小參示眾云。好諸禪德。法本無住。隨處圓成。道絕言詮。應機建立。於是衲僧家有時向高高山頂立。縱橫不陟古來今。有時向深深海底行。信步全超無伴侶。然雖恁麼。子細觀來猶是究理邊事。且道透脫一句又作麼生。良久云。還會麼。靜極光通本妙圓。嘶風玉馬過重關。迥途不落威音世。妙用全彰化外看。

上堂拈拄杖云。大洪有箇無影杖。虎踞龍蟠孰敢向。有時橫按坐虛堂。臨濟德山還膽喪。然雖恁麼。且道得力在什麼處。諸人還會麼。好是月華鋪蘚砌。相將閑邊玉堂行。

上堂云。三月安居已半過。虛明心地又如何。有求宛然成機巧。無作方能不較多。爐裡寒灰香旖旎。巖前枯木葉婆娑。白頭人在千峰上。妙唱新豐一曲歌。諸禪德。還聞麼。靈然古韻曾非間。聽者須明未兆前。

上堂拈起拂子示眾云。大洪拂子非有名非無名。七佛前前本混成。非有相非無相。淵而無下高無上。若論陰陽未兆時。卷舒俱在光明藏。諸禪德。且作麼生是光明藏。還會麼。浩然無異色。照盡未當今。

上堂云。好諸禪德。碧玉界中無變異。虛明地上有離微。妙圓一句如何說。隱顯含融豈間違。到這裡且作麼生是不間違處。還會麼。鐵牛耕破壺天遠。繁興大用不當

機。

上堂。少林九年垂一語。流布諸方多賺舉。大洪今日老婆心。未免分明細說與。良久云。還會麼。月裡姮娥巧。金鍼穿斷線。半夜繡鴛鴦。能有幾人見。

上堂云。金佛不度爐。妙相圓明會也無。泥佛不度水。落落圓音美復美。木佛不度火。蕭蕭古殿無關鎖。是須撒手直歸家。莫向半途空憇[怡-台+羅]。諸禪德。且作麼生是歸家底事。良久云。還會麼。獨坐枯根石頭上。四溟無浪月輪孤。

天寧節上堂云。天然貴異骨涉功勳。妙應昌期當陽不露。所以海音堂上擊法鼓而演真機。毗盧殿中叩鯨鐘而宣至理。於是堯風大扇。舜日高明。千邦賀誕 聖之辰。萬國祝南山之壽。且道壽年多少。還會麼。明月一輪生海面。玉人披影數金沙。

郡山迴山上堂云。七佛前前曠路賒。碧琉璃界鎖蟾華。披衣出戶更猶永。撒手還家日未斜。諸禪德。且道到家一句又作麼生。良久云。還會麼。行盡白雲路。靜聞流水聲。

陳謝典座上堂云。杓柄笊籬權在手。放行把住非窠臼。二時齋粥在精專。自利利他功不朽。且作麼生是不朽之功。還會麼。須知盤中飧。粒粒皆辛苦。

再留監寺上堂云。圓澄覺海遊戲而獨掌難鳴。沒底蘭舟敲棹而大家著力。致迷津者得岸。滯水者忘憂。然雖恁麼。更須知有一人出門無轍跡。入戶不當堂。千聖興來盡是傳語底人。諸祖降世焉敢正眼顧著。且道是什麼人。還相識麼。昨夜偶隨流水去。今朝又逐白雲歸。

上堂云。湛然無變異。虛徹有靈通。妙盡功忘處。咸歸寂照中。乃豎起拂子云。這箇是拂子。且道那箇是寂那箇是照。還會麼。鶴鷺並頭踏雪睡。月明驚起兩遲疑。

上堂云。殘冬凜冽寒。滴水便成團。翻憶少林祖。齊腰立雪難。或謂將心與汝安。覓心不見一毫端。廓然記得來時路。頓覺壺中景象寬。瑤璃光裏一般般。午夜依依月正圓。[宋-木+取]先三子得皮肉。末後一人得髓還。[宋-木+取]先三子即不問。且道那箇是末後一人。還會麼。遠觀同半月。近看却如鉤。若是知音者。思惟暗點頭。

為亡僧下火云。大地雪漫漫。臨行一句難。泥牛沉巨浸。玉馬火中寒。諸人若向這裏委悉得去。可謂來如月分眾水。去似雲散千峰。苟或未然。伏惟尚饗。

為亡僧下火云。三緣和合成有。四大離散還空。且道那箇是能上座主人翁。還會麼。來兮無依。去兮何託。紅燄亘空。不曾燒著。

為亡僧下火云。出家兒。無休暇。終日忙忙空構架。臨行一著太區區。眼見耳聞爭不怕。百骸狼藉撒奚為。普請般柴用燒化。且道中間有燒不化者麼。諸禪德。白雲靉靆空去來。渺邈清虛無縫罅。尚饗。

## 真贊

## **丹霞開山天然禪師**

丹山月冷。祖室風清。瞻之仰之。千載揚名。古佛不存檀佛像。寒岩曾許鐵牛耕。

◦

## **丹霞第二代無學禪師**

皎月流輝。影澄寒水。萬有齊彰。太虛廓爾。禪版曾酬上上機。當鋒未薦西來旨。

◦

## **丹霞第三代安禪師**

龍準高不高。虎頤短不短。半夜崑崙兒。兩手扶銀碗。

## **丹霞第四代勳禪師**

寒風凜凜。古貌堂堂。俱盧日午。瞻部夜央。聲前一句兮從爾商量。

## **淨因和尚**

即真非真。是假非假。語路未陳。言滿天下。驪龍海臥彩雲深。黑漆崑崙騎玉馬。

◦

## **般陽老人**

昔年顏似玉。今日鬢如霜。不挂金欄服。還衣白[疊\*毛]裳。彩鳳夜棲無影樹。曉天雲綻露斜陽。

## **禪人寫師真求贊**

咄這枯槁形容。平生太煞掲斗。電光石火之機。兩舌一還無口。直截根源不肯談。愛引禪徒荒艸走。

真非真。偽非偽。圓眼橫眉。醜脣平鼻。圖畫自難同。思量何處是。月籠松頂兮鶴夢初醒。雪覆蘆花兮鷺寒不睡。

寫出病形。眉目分明。直饒全似。祇得八成。聞名兮不如見面。見面兮不如聞名。霜天月滿兮難尋老兔。海門潮落兮不覓長鯨。

## **偈頌**

### **五位**

正中偏。寶殿烟籠月色前。井底燃燈天未曉。暗中誰辨往來源。

偏中正。嫫母臨[米\*壯]羞照鏡。三更玉戶不挑燈。混融非露當年影。

正中來。運步紅爐徧九垓。寶月夜光隨處靜。披雲終不露纖埃。

偏中至。大用無私何擬議。當鋒那肯落今時。他家自有超倫志。

兼中到。及盡有無真個妙。披毛戴角火中行。縱橫不落今時道。

## **又**

正中偏。寶月光凝海底天。何事漁舟難滿載。流輝爭肯透波瀾。  
偏中正。水雲深鎖漁家境。一派長江極目清。日照筠竿那露影。  
正中來。一葉輕舟泛遠灘。錦鱗不觸香鈎餌。何得絲綸更犯羶。  
偏中至。收絲却返蘆花裡。高欹龜枕恣情眠。長江信任波濤起。  
兼中到。更闌六宅無音耗。縱橫澤國路優游。樵人舉步應難造。

## 閒居

迴途玉馬休相伴。背角泥牛莫下鞭。多謝乾坤垂覆載。閒雲芳艸恣情眠。

## 自宗

空劫自己無依守。佛祖從來難啟口。九年面壁太多端。那堪更強分妍醜。

## 釣者

海際烟收欲暮天。扁舟輕泛出蘆灣。絲綸夜擲清波裡。曉得金鱗不犯竿。

## 送昇上人馳法嗣書

飛花暖日輕相送。烈焰須憑作者通。覲面不勞伸語路。丹山千里事同風。

## 送法弟應首座

落葉紛紛萬卉凋。雲衣輕卷下峩峨。他年花萼動榮日。靈樹無根暗長苗。

## 送靜上人

本自圓成不在言。泥牛耕破劫初田。夜來風月霜威重。天曉峩峯戴雪還。

## 酬寂道人

言前無句擬何伸。妙語玄談眼裡塵。一邑毗耶金粟眾。想應翻笑住山人。

## 無縫塔

月皎漁舟瑞氣旋。蘆花深處夜濤寒。可憐無限垂絲者。隨例忙忙失釣竿。

## 趙州婆子勘破話

木人嶺上歌。石女溪邊舞。明月共同途。無私照今古。

## 和淨因老師漁父詞

四海無家何拘礙。垂絲坐對烟雲靄。水急風和舟行快。嚴霜屆。蓮裳籜笠和烟戴

。洪鱗每自藏深派。今朝釣得真奇恠。鼓棹驚波桑田改。三災壞。恁時方稱生涯在

。潦倒漁翁一無解。蒼蒼雪鬢知何載。短棹輕舟泛滄海。拋鉤在。碧波深處全無閨

。錦鱗吞餌浮絲擺。樵父兩岸皆憐愛。直透龍門頭角改。誰能怪。為霖方顯靈通大

## **送昇長老住大乘**

皎月流輝千嶂冷。泥牛徐步出雲烟。玄徒若問西來意。直指胞胎未具前。

## **送蒲君錫赴任湖南提刑**

携筇揮汗別文星。匝地清風聳百城。佛祖位中留不住。瑠璃殿上綠苔生。

## **送龐婆**

剎剎西來意。塵塵古佛心。眉毛為道侶。鼻孔作知音。借問牛頭何處去。銜花幽鳥杳難尋。

## **送汲助教醫博**

未到毗耶城。不識維摩病。有客兮良醫妙術通神聖。金鍼鍼起髑髏吟。此曲千年誰與並。

## **酬劉書記朝奉二首**

生涯得力句。盡被維摩說。空劫一壺天。泥牛耕破月。

應現宰官人不識。棲心祖域道情腴。不憐金印大如斗。自貴衣中無價珠。

## **送俊化主回鄉丐筆**

昔年百丈曾輕卷。今日重歸故國求。頓使雲堂三伏裡。哭天忽爾變清秋。

## **酬滿上人**

勿謂無言為妙。面壁何嘗不道。飜思金色頭陀。却把剎竿推倒。

## **漁父子送齊明二化士**

凜凜嚴風徹骨寒。扁舟輕泛碧波瀾。金線直。玉鈎端。錦鱗無限踊躍上琅玕。

漁父從來性本寬。滿船釣得未為歡。收絲了。望層巒。舉頭方覺天際曉星殘。

## **謝安撫張學士惠茸氈**

虛室更深冷不眠。翛翛孤坐幾經年。昨宵又覺還耽睡。元是新鋪白玉氈。

## **冬日寄住菴僧**

落葉積莓苔。柴扉半不開。幽林雲密覆。花鳥恨空來。

## **送王汝弼宣教**

平生活計都消盡。錐地殊無付子孫。撒手便辭青嶂去。翛然却返白雲村。

## **送化士**

春雲不世情。滋澤興還普。從龍向海飛。散作人間雨。幽洞無門任卷舒。悠悠莫忘青山父。

## **漁父詞五首**

鶴髮漁翁歲莫論。桑田幾變爾常存。紅蓼岸。荻花村。水月虛明兩不痕。

舉目誰親無可攀。翛然獨對水雲閑。山色裏。浪花間。妙體堂堂不露顏。  
青虛為釣復為釣。斷索籃兒沒底舟。隨放蕩。任橫流。玉浪堆中得自由。  
輕泛蘭舟入天涯。拋釣擲線莫遲疑。驪龍子。巨鼈兒。不犯清波釣得伊。  
釣盡江湖曉色分。數聲羌笛韻凌雲。波浩渺。霧氤氳。敲棹回舟望海垠。

### 和無盡居士牧牛頌

頭角崢嶸未兆前。亂雲深處任安眠。不隨芳艸遙山去。何用芒童更著鞭。

### 因禪人發明以頌示之

水濶雲深古路賒。五湖禪侶共同家。夜來喜得真消息。無影林中朽木花。

### 寄度兄道友

寂照含虛未兆身。翛然那與物為隣。任經風月霜威重。枯木花芳不犯春。

### 默曜堂訪預監寺不遇

昔年摩竭令。今日孰知恩。句外潛心體。言前密意論。松風清宇宙。桂月曜乾坤。  
出戶雖無往。爭如靜掩門。

### 靜上人病以偈貽之

火風地水合為身。猶若晴空一點塵。借問病從何處起。祇應誰是病中人。

### 退居後以二偈示預環二禪者

十年同此振綱維。萬種諭訛悉共知。今日脫然無一事。坐觀明月照瑠璃。  
水最為清月最圓。月光含水水涵天。混融不落威音世。到此如何語正偏。

### 送環知客歸省親

清風明月秋光半。環禪別我云南歸。當堂子母相逢日。妙圓孰敢分離微。咦。撥轉吾家向上機。回頭觸處生光輝。

### 送覺上人

異類潛行未兆前。昂藏頭角聳摩天。迴途莫守寒岸草。耕破威音那畔田。

### 謝王宣教見訪

柴扉常對白雲開。玉鳳銜花去又回。不學東林遠沽酒。淵明多謝入山來。

### 喜吳雲叟公裕垂訪

山路春風桃李香。延陵長者貴岩房。行行廓爾忘途轍。步步翛然合道場。妙淨宗  
乘松宿鶴。虛明田地月含霜。相逢相見有何事。共語毗盧頂後光。

### 送止維那作丐

常思止禪者。返本如嬰兒。一念萬年去。春秋都不知。斫倒寒巖無影樹。迴頭焰  
裡再抽枝。春老別吾入塵去。緣生會有歸山咦。淨榻相看坐。清風起四維。

## 和正知藏適軒

適軒新開非華飾。為愛清涼消暑濕。景象千般何處來。塵埃一點應難入。蒲團禪版靜沉沉。松韻竹風常裊裊。香斷爐寒坐夜深。苔墀月滿無人立。

## 謝蒙城善友惠米

客到蒙城有信歸。慇懃惠米助晨炊。老僧鉢滿慵相喚。長者恩深祇自知。粒粒圓成難著會。明明嚼碎更何疑。趙州遺語誠非謬。一飽元來忘百飢。

## 任善友求頌

差別道難通。應須識自宗。無根枯樹子。月夜影重重。

## 丹霞誦法弟新建暖堂以頌慶之

暖堂新構侵雲表。桂月松風常滿抱。玉燭光中靜應時。言前妙唱般陽道。

## 山居五首

林麓結茅廬。翛然稱所居。松風驚破夢。澗水靜涵虛。春老花猶媚。秋殘葉未踈。  
良宵無限意。東嶺月生初。

祇這一閑田。古今無變遷。泥牛耕不盡。寶月鎮長圓。巖桂和烟翠。溪花含露鮮。  
甘藏青嶂裡。懶更謁時賢。

家近亂山根。日高懶啟門。樵歌雲外唱。胡曲句前論。路僻無人到。庭荒有蘚痕。  
蕭蕭巖石畔。祇麼老烟村。

兀坐鎮長行。孰人知此情。竹風輕有韻。巖溜細無聲。岌岌三山秀。依依片月明。  
門前枯樹子。孤鶴夢難成。

不戀白雲關。家山撤手還。玉爐香旖旎。石砌水潺湲。庭樹烟籠合。牕軒雨灑斑。  
經行及坐臥。常在寂寥間。

## 寄隨守向大夫三首

歲寒本欲老林垌。茲沐恩光入翠層。再整絲綸垂釣手。隨緣漁水且騰騰。

道同曾未隔毫端。相別相逢會者難。偶此又蒙清照及。松風桂月襲人寒。

無絃琴上有希聲。此遇知音作證明。不犯指端彈一曲。碧瑠璃界月三更。

## 送吳公裕

天氣暄妍三月春。青山垂訪白頭人。威儀雍肅披儒雅。語論清冷洗渴塵。道合圓常無異路。心空及第自通津。相逢相別休懷念。千里同風德乃鄰。

## 獨上人求頌

一九逢春信。梅花破雪開。箇中如會得。千里不空來。

## 和張居士

默訥虛明履趣深。蟾蜍推月照天心。松風未作寒林靜。一弄無絃琴上音。

### 和張伯威見寄

今日重來坐暖霞。故人笑謂老年華。劫空別有壺春在。雲對青山興莫涯。

### 和章陽叔見寄二首

休將水乳試鷺王。妙識醇醸別有方。本地不消春氣力。靈枝劫外有餘芳。

師曠離婁不我徒。昭然罔象得玄珠。心萌口擬成途轍。底事圓明異有無。

### 酬劉于叔

妙句靈然溢目寒。幽微旨趣會還難。相逢更問無絃曲。風入松梢不在彈。

## 隨州大洪山淳禪師語錄

### No. 1425-B

洞山之道六傳而至大陽殆將斷絕。投子續之。三傳而至丹霞淳禪師。師出真歇宏智二子以張皇其門風。由是觀之。師寔吾門之中興也。然而師語要。世失其所傳。後裔靡不以是為恨矣。屬者偶得十三葉法孫大容清公所贍寫之。師住大洪語錄一卷。恰如旱天逢甘雨。忻躍之餘。募刊以廣其傳。因裁一偈敬題其後云。

掀翻洞水盛宗風 廣大波瀾灑日東

六百經霜猶未沒 重刊棗梓永流通

寶永七年季春上浣

遠孫小比丘良機盥手百拜書

## 增輯丹霞淳禪師語錄

上堂云。乾坤之內宇宙之間。中有一寶秘在形山。肇法師恁麼道。祇解指蹤話跡。且不能拈示於人。丹霞今日擘開宇宙。打破形山。為諸人拈出。具眼者辨取。以拄杖卓一下曰。還見麼。鶩鶩立雪非同色。明月蘆花不似他。

上堂。舉德山示眾曰。我宗無語句。實無一法與人。德山恁麼說話。可謂是祇知入草求人。不覺通身泥水。子細觀來。祇具一隻眼。若是丹霞則不然。我宗有語句。金刀剪不開。深深玄妙旨。玉女夜懷胎。

上堂。亭亭日午猶虧半。寂寂三更尚未圓。六戶不曾知暖意。往來常在三更前。

上堂。寶月流輝。澄潭布影。水無蘸月之意。月無分照之心。水月兩忘方可稱斷。所以道昇天底事直須颺却。十成底事直須去却。擲地金聲不須回顧。若能如是。始解向異類中行。諸人到這裏還相委悉麼。良久曰。常行不舉人間步。披毛戴角混泥塵。

真歇參次。師問如何是空劫已前自己。歇擬對。師曰。你閑在。且去。一日登鉢孟峯豁然契悟。徑歸侍立。師掌曰。將謂你知有。歇忻然拜之。翌日上堂。日照孤峯翠。月臨溪水寒。祖師玄妙訣。莫向寸心安。便下座。歇直前曰。今日陞座更謾某甲不得也。師曰。你試舉我今日陞座底看。歇良久。師曰將謂你瞽地。歇便出。

宏智參次。師問如何是空劫已前自己。智曰井底蝦蟇吞却月。三更不借夜明簾。師曰未在更道。智擬議。師打一拂子云。又道不借。智於言下大悟。

僧問。牛頭未見四祖時如何。師曰金菊乍開蜂競採。曰見後如何。師曰苗枯華謝了無依。

### 舉古

舉北院問青峰。洛浦道。入荒田不揀。信手拈來草。何不道作麼生是信手拈來草。峰作拈勢。師別曰。是則是。只是未能喫草。

舉甘贊行者接待。有僧曰行者接待不易。贊云譬如餵驢餵馬。明安曰。也知行者常行此路。師別曰。來年與行者買一領直裰。

### 頌古

僧問九峯虔云。承聞和尚有言。諸聖間出。祇是傳語人。是否。師曰是。曰。世尊一手指天。一手指地云。天上天下唯吾獨尊。和尚為甚麼却喚作傳語人。師曰。祇為一手指天一手指地。所以喚作傳語人。

妙相圓明不可親。奴兒婢子自殷勤。指天指地稱尊大。也是傳言送語人。

僧問洞山詮。清淨行者不入涅槃。破戒比丘不入地獄時如何。師云。度盡無邊影。還他越涅槃。

相好巍巍大丈夫。一生無智恰如愚。從來佛祖猶難望。地獄天堂豈可拘。

青原思禪師初參六祖。問。當何所務即不落階級。祖曰汝曾作什麼來。師曰聖諦亦不為。祖曰落何階級。師曰。聖諦尚不為。何階級之有。祖深器之。

卓爾難將正眼窺。迴超今古類難齊。苔封古殿無人侍。月鎖蒼梧鳳不棲。

青原因石頭問。和尚出嶺多少時。師曰我卻不知汝早晚離曹溪。曰希遷不從曹溪來。師曰我亦知汝去處也。曰。和尚幸是大人。莫造次。

木人來問青霄路。石女年尊似不聞。攜手相將歸故國。暮山岌岌鎖重雲。

藥山惟儼禪師一日在石上坐次。石頭問曰汝在這裏作麼。師曰一切不為。曰恁麼即閒坐也。師曰若閒坐即為也。曰。汝道不為。且不為箇什麼。師曰千聖亦不識。頭以偈讚曰。從來共住不知名。任運相將祇麼行。自古上賢猶不識。造次凡流豈可明。

玄微及盡本翛然。若謂渠閒萬八千。月印澄江魚不見。釣人何必更拋筌。

道吾因石霜問。百年後有人問極則事。向他道甚麼。師喚沙彌。彌應諾。師曰添淨瓶水著。師良久却問霜。適來問甚麼。霜擬再舉。師便歸方丈。霜於此有省。

垂手還他作者機。尋常語裏布鎗旗。重詢擬進歸方丈。一句分明更不疑。

道吾到五峯峯問。還識藥山老宿麼。師曰不識。曰為甚麼不識。師曰不識不識。

白雲深處路難通。擬問踪由已涉功。掛角羚羊無影迹。從容還落正偏中。

雲巖同道吾自南泉回藥山。師問藥山曰如何是異類中行。山曰。吾今日困倦。且待別時來。師曰某甲特為此事歸山來。山曰且去。師便出。吾在方丈外聞師不薦。不覺駁得指頭血出。下來問師。師兄去問和尚那。因緣作麼生。師曰不為某甲說。吾便低頭。

饑浪嫩草遙山去。渴飲寒泉曲澗回。放蕩不耕空劫地。暮天何用牧歌催。

雲巖因僧問。二十年在百丈侍巾鉢。為甚麼心燈不續。師曰頭上寶華冠。曰頭上寶華冠意旨如何。師曰大唐天子及冥王。後僧舉問九峯虔禪師。大唐天子及冥王意旨如何。虔曰却憶洞上之言。

玉鞭高舉擊金門。引出珊瑚價莫論。迥古輪王全意氣。不彰寶印自然尊。

高沙彌住菴。一日雨中來相看藥山。山曰你來也。師曰是。山曰可煞濕。師曰不打這鼓笛。雲巖曰皮也無打甚麼鼓。道吾曰鼓也無打甚麼皮。師曰今日大好一場曲調。

偶爾垂言借問伊。知音爭使落今時。胡笳不犯宮商曲。玉笛橫時劫外吹。

百巖明哲禪師。洞山與密師伯到參。師問曰閻黎近離什麼處。洞山曰近離湖南。師曰觀察使姓什麼。曰不得姓。師曰名什麼。曰不得名。師曰還治事也無。曰自有廊幕在。師曰豈不出入。山便拂袖去。師明日入僧堂曰。昨日對二閻黎一轉語不穩。今請二閻黎道。若道得。老僧便開粥相伴過夏。速道速道。山曰太尊貴生。師乃開粥共過一夏。

燒香人靜杳無聲。苔滿丹墀皓月明。入戶當堂慵正坐。出門尤懶下階行。

船子誠禪師囑夾山云。直須藏身處沒蹤跡。沒蹤跡處莫藏身。吾三十年在藥山祇明斯事。

白雲檻外思悠哉。密密金刀剪不開。幽洞不拘金鎖意。縱橫無繫去還來。

青峯楚因僧問。大事已成。為甚麼也如喪考妣。師曰。不得春風花不開。及至花開又吹落。

家山歸到莫因循。竭力寅昏奉二親。機盡功忘恩義斷。便成不孝閹提人。

樟樹省禪師問洞山。甚麼處來。山曰親近來。師曰。若是親近。用動這兩片皮作甚麼。後曹山聞舉乃云。一子親得。

從來父子不相離。石女何勞更問伊。昨夜寒岩無影木。白雲深處露橫枝。

洞山因僧問。和尚教學人行鳥道。未審如何行鳥道。師曰不逢一人。曰如何行。師曰直須足下無私去。曰。祇如行鳥道。莫便是本來面目否。師曰闍黎因甚顛倒。曰甚麼處是學人顛倒。師曰。若不顛倒。因甚麼卻認奴作郎。曰如何是本來面目。師曰不行鳥道。

古路翛然倚太虛。行玄猶是涉崎嶇。不登鳥道雖為妙。點檢將來已觸途。

洞山問僧。世間何物最苦。曰地獄最苦。師曰。不然。在此衣線下不明大事是名最苦。

鑊湯爐炭幾何般。地獄三途未苦酸。須信新豐親切語。袈裟之下莫顛頽。

神山與洞山過獨木橋。洞先過了拈起木橋曰過來。師喚價闍黎。洞乃放下木橋。

平地無端鑿陷坑。木橋拈起使人行。沉沉寒水如何渡。月夜金雞報五更。

漸源興禪師一日持鉢到石霜。於法堂上從東過西從西過東。霜曰作麼。師曰覓先師靈骨。霜曰。洪波浩渺白浪滔天。覓甚先師靈骨。師曰正好著力。霜曰。這裡針劄不入。著甚麼力。師持鉢肩上便出。

本地靈明無一物。幾人認得黃金骨。扶鉢肩上便行時。大辯從來還若訥。

夾山因僧問。撥塵見佛時如何。師曰。直須揮劍。若不揮劍。漁父栖巢。僧後問石霜。撥塵見佛時如何。霜曰。渠無國土。甚處逢渠。僧回舉似師。師曰門庭施設不如老僧。入理深談猶較石霜百步。

當機一句玉珊瑚。內外玲瓏溢目寒。無漏國中曾不住。月華影裡見應難。

夾山因僧問。如何是夾山境。師曰。猿抱子歸青嶂後。鳥銜花落碧巖前。

蚌含明月珠生腹。龍擁深雲雨洒空。莫向平田翻巨浪。直須點點盡朝東。

夾山因僧問。會處却不同。不會處請師一言。師曰。戶挂凋林。影中辨取。

威音那畔不能行。撒手還家懶問程。寢殿無人空寂寂。滿窓唯有月虛明。

洞山价禪師解夏上堂曰。秋初夏末。兄弟或東或西。直須向萬里無寸草處去。良久曰。祇如萬里無寸草處作麼生去。顧視左右曰。欲知此事。直須如枯木上花開方與

他合。石霜曰。出門便是草。明安曰。直得出門亦是草漫漫地。

歸家豈坐碧雲牀。出戶不行青草地。南北東西本自由。渠無向背那廻避。

僧問洛浦安禪師。眾手淘金誰是得者。浦云拳中舊寶豈假披沙。僧云恁麼則展手不逢也。浦云莫將鶴唳擬當鶯啼。

淘金豈假披沙得。不觸波瀾猶費力。露柱三更忽放光。此時未審何人識。

僧問洛浦。如何是祖師西來意。浦云。青嵐覆處出岫藏峯。白月輝時碧潭無影。群花未發梅先拆。萬木凋零栢轉奇。雲淡不彰篩月影。煙輕那露引風枝。

僧問洛浦。一毫吞盡巨海。於中更復何言。浦云。家有白澤之圖。必無如是妖怪。

◦

巖前雖有雲千頃。戶內殊無半夜燈。極目危巒今古秀。暮天斜照碧層層。

蛤溪道者相看。洛浦問曰。自從梨溪相別。今得幾年。溪曰和尚猶記得昔時事。浦曰見說道者總忘却年月也。溪曰和尚住持事繁且容子細。浦曰道者住山事繁。

這般消息不尋常。蟾桂枝枝布遠香。昨夜姮娥呈巧妙。眼睛直上綉鴛鴦。

洛浦因僧問。供養百千諸佛。不如供養一無心道人。百千諸佛有何過。無心道人有何德。師曰。一片白雲橫谷口。幾多歸鳥盡迷巢。

拾得踈慵非覺曉。寒山懶惰不知歸。聲前一句圓音美。物外三山片月輝。

僧問洛浦。如何是佛法大意。師曰。雪覆孤峯峯不白。雨滴石筍筍須生。

海底龍吟雲雨潤。林中虎嘯谷風清。莫言滿路生荊棘。況是家貧少送迎。

洛浦因僧問。學人擬歸鄉時如何。師曰家破人亡子歸何處。曰恁麼則不歸去也。師曰。庭前殘雪日輪消。室內游塵遣誰掃。

太平鄉國路空賒。歸興悠悠思莫涯。撒手到家何所有。琉璃寶殿鎖蟾華。

洛浦因僧問。祖意教意是同是別。師曰。日月並輪輝。誰家別有路。曰恁麼則顯晦殊途事非一槩。師曰。但自不亡羊。何須泣岐路。

月篩松影高低樹。日照池心上下天。赫赫炎空非卓午。團團秋夜不知圓。

韶山因僧問。如何是和尚家風。師曰。絕頂無根草。無風葉自搖。

妙峯孤頂偏肥膩。天產靈苗不觸地。翠葉無風常自搖。清香那逐春光媚。

韶山因僧到參。禮拜起立。師曰大才藏拙戶。僧過一邊立。師曰喪却棟梁材。

又手須知已隔津。更重進步轉漂淪。頑銅若作黃金貨。祇可瞞他無眼人。

黃山輪禪師來參夾山。山問曰甚麼處來。師曰閩中來。山曰還識老僧麼。師曰和尚還識學人麼。山曰。不然。子且還老僧草鞋錢。然後老僧還汝廬陵米價。師曰恁麼則不識和尚。未審廬陵米作麼生價。山曰真師子兒善能哮吼。

父子相逢眼倍明。靈苗叢裏坦然行。箇中若為金毛子。已是鹽梅觸大羹。

上藍超禪師因僧問。如何是上藍本分事。師曰。不從千聖借。豈向萬機求。曰不借不求時如何。師曰不可拈放闔梨手裡得麼。

一片靈明本妙圓。箇中非正亦非偏。寶峯瑞草無根蒂。不待春功色自鮮。  
僧問四禪禪師。古人有請不背。今請和尚入井。還去也無。師云。深深無別源。  
飲者消諸渴。

曹溪源派古之今。意識徒將渡淺深。好是昔人遊戲處。雖然入井不曾沉。

無著喜禪師往五臺華嚴寺。至金剛窟禮謁。遇老翁牽牛行。邀師入寺。翁曰近自何來。師曰南方。曰南方佛法如何住持。師曰末法比丘少奉戒律。曰多少眾。師曰或三百或五百。師却問此間佛法如何住持。曰龍蛇混雜凡聖同居。師曰多少眾。曰前三三後三三。

前後三三不失宗。迥迢千聖數難窮。金剛腦後全軒露。疊疊青山鎖翠空。

大光誨禪師因僧問。祇如達磨是祖否。師曰不是祖。曰。既不是祖。又來作甚麼。師曰祇為汝不薦。曰薦後如何。師曰方知不是祖。

少林續焰事堪可。臘夜梅開雪後枝。黃蘖昔年曾有語。大唐國裏沒禪師。

九峯在石霜作侍者。石霜遷化後。眾欲請首座接續住持。師白眾問首座曰。先師道休去歇去。冷啾啾去。一條白練去。古廟香爐去。一念萬年去。且道明什麼邊事。座曰明一色邊事。師曰與麼則不會先師意在。座曰但裝香來。乃焚香曰。我不會先師意。香烟起處脫去不得者。言訖便坐脫。師拊其背曰。坐脫立亡即不無。先師意未夢見在。

帶角披毛異類身。寒灰枯木眼中塵。雖然未會先師意。爭奈臨行一著親。

海湖禪師有座主問。和尚甚麼年行道。師曰座主近前來。主近前。師曰祇如橋陳如是甚麼年行道。主茫然。師喝曰這尿床鬼。

多是從人學得來。一生空把口胡開。欲窮此片虛明地。七佛前前總不該。

天蓋幽禪師有一院名無垢淨光。造浴室。有人問。既是無垢淨光。為甚麼却造浴室。僧無語。後請師代。師曰。三秋明月夜。不是騁團圓。

雖然答盡深深意。爭奈投機句未親。欲會本來無垢的。更須入水見長人。

九峯因僧問。祖祖相傳復傳何事。師曰。釋迦悳。迦葉富。曰如何是釋迦悳。師曰無物與人。曰如何是迦葉富。師曰國內孟嘗君。曰畢竟傳底事作麼生。師曰百歲老人分夜燈。

寂光影裏現全身。貴異天然迥出倫。家富兒奴偏得力。夜分燈火照西隣。

石柱禪師遊方時到洞山。時虔和尚垂語曰。有四種人。一人說過佛祖。一步行不得。一人行過佛祖。一句說不得。一人說得行得。一人說不得行不得。阿那箇是其人。師出眾曰。一人說過佛祖行不得者。祇是無舌不許行。一人行過佛祖。一句說不得者。祇是無足不許說。一人說得行得者。祇是函蓋相稱。一人說不得行不得者。如斷命求活。此是石女兒擔枷帶鎖。洞山曰閻黎分上作麼生。師曰該通分上卓卓寧彰。山曰祇如海上明公秀又作麼生。師曰幻人相逢拊掌呵呵。

海底泥牛耕白月。雲中木馬驟清風。胡僧懶捧西乾鉢。半夜乘舟過海東。

湧泉欣禪師因唐武宗廢教。在院看牛。時有強德二禪客到。於路次見師騎牛不識。乃云。蹄角甚分明。爭奈騎者不識。師驟牛而去。二禪客相次憩於樹下煎茶。師回。下牛近前問訊與坐喫茶。師乃問二禪客近離甚處。云那邊。師曰那邊事作麼生。禪客提起茶盞。師曰此猶是這邊。那邊事作麼生。二人無對。師曰莫道騎牛者不識好。

芳草漫漫豈變秋。牧童白牯恣優游。異中有路人難見。却謂騎牛不識牛。

夾山上堂云。明不越戶。穴不栖巢。目不顧他位裏。脚不踏他位裏。六戶不掩。四衢無蹤。學不停午。意不立玄。千劫眼不借舌頭底。萬劫舌頭不顧。眼中明峻機。不假鋒鎚事。到這裡有甚麼事。闔黎。竿頭絲線從君弄。不犯清波意自殊。

月沉碧海龍非隱。霧鎖蒼梧鳳不知。劫外森森無影木。垂陰自有未萌枝。

湧泉欣因僧問。如何是相傳底事。師曰。龍吐長生水。魚吞無盡漚。曰請師挑誓。師曰。擂鼓轉船頭。棹穿波底月。

依依半月沉寒水。耿耿三星落碧巒。昔日雲巖曾漏泄。金輪王子寶花冠。

僧問文殊禪師。僧繇為甚麼邈志公真不得。師曰。非但僧繇。志公亦邈不得。曰志公為甚麼邈不得。師曰彩繪不將來。曰和尚還邈得也無。曰我亦邈不得。曰和尚為甚麼邈不得。師曰。渠不苟我顏色。教我如何邈。

身光熾盛相巍巍。妙手如何彩繪伊。休問僧繇吳道士。志公佗日不能知。

曹山寂禪師因僧問。世間甚麼物最貴。師曰死貓兒最貴。曰為甚麼死貓兒却貴。師曰無人著價。

腥臊紅爛不堪親。觸動輕輕血污身。何事杳無人著價。為伊非是世間珍。

曹山辭洞山。山問曰向甚麼處去。師曰不變異處去。山曰不變異處豈有去邪。師曰去亦不變異。

家家門掩蟾蜍月。處處鶯啼楊柳風。若謂縱橫無變異。猶如擲劍擬虛空。

曹山因僧問。五位對賓時如何。師曰汝即今問那箇位。曰。某甲從偏位中來。請師向正位中接。師曰不接。曰為甚麼不接。師曰恐落偏位中去。師却問僧。祇如不接。是對賓是不對賓。曰早是對賓了也。師曰如是如是。

月中玉兔夜懷胎。日裏金烏朝抱卵。黑漆崑崙踏雪行。轉身打破琉璃碗。

龍牙遁禪師因僧問。二鼠侵藤時如何。師曰須有隱身處始。得曰如何是隱身處。師曰還見儂家麼。

寒月依依上遠峯。平湖萬頃練光封。漁歌驚起沙洲鷺。飛入蘆花不見踪。

疎山仁禪師因主事僧為師造壽塔畢。師曰將多少錢與匠人。曰一切在和尚。師曰。為將三文錢與匠人。為將兩文錢與匠人。為將一文錢與匠人。若道得。與吾親造塔來。僧無語。後僧舉似大嶺菴和尚。嶺曰還有人道得麼。曰未有人道得。嶺曰。汝歸與疎山道。若將三錢與匠人。和尚此生決定不得塔。若將兩錢與匠人。和尚與

匠人共出一隻手。若將一錢與匠人。累他匠人眉鬚墮落。僧回如教而說。師具威儀望大嶺作禮嘆曰。將謂無人。大嶺有古佛。放光射到此間。雖然如是。也是臘月蓮花。大嶺後聞此語曰。我恁麼道。早是龜毛長三尺。

清風吹動釣魚船。鼓起澄波浪拍天。堪笑錦鱗爭戲水。到頭俱被釣絲牽。

疎山冬至夜有僧上堂問。如何是冬來意。師曰京中出大黃。

京師出大黃。熟處最難忘。道吾常作舞。元是謝三郎。

疎山因靈泉問。枯木生花始與他合。是這邊句是那邊句。師曰亦是這邊句。曰如何是那邊句。師曰石牛吐出三春霧。靈雀不栖無影林。

滄海無風波浪平。烟收水色虛含月。寒光一帶望何窮。誰辨箇中龍退骨。

雲居膺禪師上堂曰。得者不輕微。明者不賤用。識者不咨嗟。解者無厭惡。從天降下則貧寒。從地湧出則富貴。門裡出身易。身裡出門難。動則埋身千丈。不動則當處生苗。一言迥脫。獨拔當時。言語不要多。多則無用處。

門頭戶尾事千差。了盡猶來未到家。明月堂前無影木。嚴凝雪夜正開花。

青林虔禪師因僧問。學人徑往時如何。師曰。死蛇當大路。勸子莫當頭。曰當頭者如何。師曰喪子命根。曰不當頭時如何。師曰亦無迴避處。曰正當恁麼時如何。師曰失却也。曰未審向甚麼處去。師曰草深無覓處。曰和尚也須隄防始得。師撫掌曰一等是箇毒氣。

長江澄澈即蟾華。滿目清光未是家。借問漁舟何處去。夜深依舊宿蘆花。

乾峯和尚上堂曰。舉一不得。舉二放過。一著落在第二。雲門出眾曰。昨日有人從天台來。却往徑山去。師曰典座來日不得普請。便下座。

聲前一句口如眉。佛祖從來總不知。昨夜崑崙閑說夢。白頭生得黑頭兒。

白水仁禪師上堂曰。老僧尋常不欲向聲前句後鼓弄人家男女。何故。聲且不是聲。色且不是色。時有僧問如何是聲不是聲。師曰喚作色得麼。曰如何是色不是色。師曰喚作聲得麼。僧作禮。師曰且道為汝說答汝話。若向這裡會得。許你有箇入路。

色白色兮聲自聲。新鶯啼處柳烟輕。門門有路通京國。三島斜橫海月明。

白馬儒禪師因僧問。如何是法身向上事。師曰井底蝦蟆吞却月。

九重深密視聽難。玉殿瓊樓宿霧攢。燮理盡歸臣相事。輪王不戴寶花冠。

天童啟禪師因僧問。如何是應用無虧底眼。師曰恰如瞎一般。

盲聾瘡痘迥天真。眼似眉毛道始鄰。昨夜東君潛布令。黃鸝啼處綠楊春。

玄沙備禪師一日遣僧送書上雪峰和尚。峯開緘唯白紙三幅。問僧會麼。曰不會。峯曰。不見道君子千里同風。僧回舉似於師。師曰遮老和尚蹉過也不知。

三番白紙問寒暄。千里同風月滿船。奪得高標全用處。盤蛇口內打鞦韆。

北院靜禪師因僧問。牛頭未見四祖時如何。師曰。異境靈松。覩者皆羨。曰見後如何。師曰。葉落已枝摧。風來不得韻。

寶杖親携挂翠纓。徘徊常遶玉堦行。轉身就父無標的。拈却花冠不得名。

曹山霞禪師因僧侍立。師曰可煞熱。曰是。師曰祇如熱向甚麼處迴避。曰鑊湯爐炭裡迴避。師曰鑊湯爐炭裏又作麼生迴避。曰眾苦不能到。

崑岡片玉火中潤。碧落孤蟾水底圓。一念翛然無異色。任從滄海變桑田。

木平道禪師問洛浦。一漚未發時。如何辨其水脉。浦曰。移舟諳水勢。舉棹別波瀾。師不契乃參蟠龍。亦如前問。龍曰。移舟不別水。舉棹即迷源。師從此悟入。

金烏玉兔兩交馳。照破威音未兆時。若謂青霄別有路。木人依舊皺雙眉。

谷山緣禪師。僧問如何是祖師西來意。師曰。夜半烏兒頭戴雪。天明啞子抱頭歸。

瑞靄祥烟鎖玉樓。妙年王子恣優游。琉璃殿上騎金馬。明月堂前輶綉毬。

白雲藏禪師。僧問如何是深深處。師曰矮子渡深溪。

白頭童子智尤長。半夜三更渡渺茫。任運往來無間斷。不消船艇與浮囊。

同安察禪師。僧問如何是天人師。師曰。頭上角不全。身上毛不出。

秘殿重圍曉尚寒。丹墀苔潤未排班。寶香鳳燭煙雲合。寂寂簾垂不露顏。

新羅泊巖禪師。僧問如何是禪。師曰古塚不為家。曰如何是道。師曰徒勞車馬迹。曰如何是教。師曰貝葉收不盡。

故國清平久有年。白頭猶自戀生緣。牧童却解忘功業。懶放牛兒不把鞭。(古塚不為家)

曹溪古路綠苔生。車馬登臨已涉程。野老癡羸兼跛挈。手携玉杖夜深行。(徒勞車馬迹)

四十九年成露布。五千餘軸盡言詮。妙明一句威音外。折角泥牛雪裏眠。(貝葉收不盡)

新羅大嶺禪師。僧問如何是一切處清淨。師曰。截瓊枝寸寸是寶。析栴檀片片皆香。

乾坤盡是黃金國。萬有全彰淨妙身。玉女背風無巧拙。靈苗花秀不知春。

泐潭明禪師。僧問。碓搗磨磨。不得忘却時如何。師曰虎口裡活雀兒。

一念蕭蕭不記年。皮膚脫落自完全。長天夜夜清如鏡。萬里無雲孤月圓。

同安丕禪師。僧問如何是和尚家風。師曰。金鷄抱子歸霄漢。玉兔懷胎入紫微。曰忽遇客來如何祇待。師曰。金果朝來猿摘去。玉花晚後鳳銜歸。

日午烟凝山突兀。夜央天淡月嬋娟。混然寂照寒宵永。明暗圓融未兆前。

同安丕因僧問。依經解義三世佛冤。離經一字即同魔說。此理如何。師曰。孤峯迥秀不挂烟蘿。片月行空白雲自異。

雲自高飛水自流。海天空闊泳孤舟。夜深不向蘆灣宿。迥出中間與兩頭。

雲居簡禪師。僧問孤峯獨宿時如何。師曰。閑著七間僧堂不宿。阿誰教你孤峯獨宿。

法爾非修本十成。平常酬答最分明。端然指出長安道。無奈遊人不肯行。  
新羅雲住禪師因僧問。如何是諸佛師。師曰文殊聳耳。

無相光中未兆身。清虛渺邈豈為隣。一輪明月當軒照。玉殿蕭蕭不見人。  
荷玉慧禪師。僧問如何是西來的的意。師曰不禮拜更待何時。

虛堂寂寂夜深寒。携得瑤琴月下彈。不是知音徒側耳。悲風流水豈相干。

阿育通禪師。僧問如何是和尚家風。師曰渾身不直五分錢。曰恁麼則太貧寒生。  
師曰祖代如此。曰如何施設。師曰隨家豐儉。

祖代家風沒一文。清貧中更是清貧。著衣喫飯隨豐儉。物物頭頭用最親。

護國澄禪師因僧問。如何是本來心。師曰。犀因翫月紋生角。象被雷驚花入牙。  
三脚靈龜荒徑走。一枝瑞草亂峯垂。崑岡含玉山先潤。涼免懷胎月未知。

護國澄因僧問。如何是本來父母。師曰頭不白者。曰將何奉獻。師曰。殷勤無米飯。  
堂前不問親。

出門徧界無知己。入戶盈眸不見親。虛室夜寒何所有。碧天明月頗為鄰。  
金峯志禪師。僧問四海晏清時如何。師曰猶是堵下漢。

四海烟塵已晏然。當軒明月照人寒。大功不賜將軍賞。寶馬金槍頓懶觀。  
蜀州西禪禪師。僧問如何是非思量處。師曰誰見虛空夜點頭。

一點靈明六不收。照然何用更凝眸。箇中消息人難委。獨有虛空暗點頭。  
廣德延禪師。僧問如何是透法身句。師曰。無力登山水。茅戶絕知音。

體妙探玄盡涉程。爭如野老異中行。功忘日用平懷穩。免事君王寵辱驚。

石門蘊禪師。僧問如何是和尚家風。師曰。物外獨騎千里象。萬年松下擊金鐘。  
夜明簾外月朦朧。騎象翻身擊寶鐘。洪韻上騰三界外。聾夫何事睡猶濃。

淨眾禪師。僧問蓮華未出水時如何。師曰菡萏滿池流。曰出水後如何。師曰葉落  
不知秋。

白藕未萌非隱的。紅花出水不當陽。遊人莫用傳消息。自有清風透遠香。

同安志禪師。僧問二機不到處如何舉唱。師曰。偏處不逢。玄中不失。

這邊那畔總難逢。一句無私不處中。紅日暮沉西嶂外。空留孤影照溪東。

廣德義禪師。僧問。古人云。言語道斷非去來今。此理如何。師曰。彌勒涅槃知  
幾劫。護明猶未降迦維。

妙湛圓明第一機。降生成道涅槃時。迦維摩竭雙林樹。認著元來不是伊。

廣德義因僧問。久負不逢時如何。師曰。扇開人不遇。陋巷莫能收。

妙體堂堂相好全。青霄獨步躡金蓮。千華臺上猶慵坐。弊垢襯衫豈肯穿。

石門徹禪師。僧問雲光作牛意旨如何。師曰。陋巷不騎金色馬。回途却著破襯衫。

瑞艸叢中懶欲眠。徐行處處迥翛然。披毛戴角人難識。為報芒童不用鞭。

廣德周禪師。僧問波浪之中如何得妙。師曰。橈棹不施兼底脫。往來終不借浮囊。

一句相酬難取則。輪王不化閻浮國。無邊剎海浪痕平。獨駕泥牛耕月色。

太原隱禪師。僧問數家檀越請。未審赴誰家。師曰。月印千江水。門門盡有僧。

妙圓無相劫前人。隨類權分百億身。月夜御樓纔報曉。平明六國盡逢春。

梁山觀禪師。僧問如何是空劫已前事。師曰。擊動乾坤鼓。時人聽不聞。

虛空為鼓須彌槌。擊者雖多聽者稀。半夜觸體驚破夢。滿頭明月不思歸。

梁山因僧問。祖意教意是同是別。師曰。金烏東上人皆貴。玉兔西沉佛祖迷。

靈山會上言雖普。少室峯前句未形。瑞草蒙茸含月秀。寒松蓊鬱出雲青。

梁山因僧問。如何是日用事。師曰。碧玉點破瑠璃色。滿目紅塵不見沙。

劫火洞然無相宅。金門不覩玉樓家。寶天雲淡銀河冷。浩浩波瀾豈動沙。

大陽玄禪師上堂曰。嵯峨萬仞。鳥道難通。劍刃輕冰。誰當履踐。宗乘妙句。語路難陳。不二法門。淨名杜口。所以達磨西來。九年面壁始遇知音。大陽今日也太無端。珍重。

不挂唇皮一句奇。少林冷坐最慈悲。須知此道非傳授。立雪神光已強為。

大陽僧問如何是和尚家風。師曰。滿餅傾不出。大地沒飢人。

荊山美玉何須辨。赤水玄珠不用拈。罔象無心黃帝重。卞和有智楚王嫌。

投子青禪師。僧問。師唱誰家曲。宗風嗣阿誰。師曰。威音前一箭。射透兩重山。曰如何是相付底事。師曰。全因淮地月。得照郢陽春。曰恁麼則入水見長人。師曰。祇知荊玉異。那辨楚王心。師隨後以拂子敲禪牀一下。

珊瑚枝上玉花開。風遞清香遍九垓。勿謂乾坤成委曲。韶陽親見睦州來。

投子示眾云。若論此事。如鸞鳳沖霄不留其跡。羚羊挂角那覓其蹤。金龍不守於寒潭。玉兔豈棲於蟾影。其或賓主若立須威音路外搖頭。問答言陳乃玄路傍提為唱。若能如是。猶在半途。更乃凝眸。不勞相見。

水澄月滿道人愁。妙盡無依類莫收。劫外正偏兼帶路。不萌枝上辨春秋。

投子因僧問。和尚適來拈香祝壽。且道當今皇帝壽年多少。師曰。月籠丹桂遠。星拱北辰高。

六國清平賀聖年。珠簾高卷月明前。金輪那肯當堂坐。不用丹墀擊靜鞭。

東京天寧芙蓉楷禪師。僧問。師唱誰家曲。宗風嗣阿誰。師曰。金鳳夜棲無影樹。峰巒纔露海雲遮。

等閑應問豈安排。一句全提隱顯該。薄霧依依籠古徑。孤峰終不露崔嵬。  
芙蓉楷僧問。夜半正明。天曉不露。如何是不露底事。師曰。滿船空載月。漁父  
宿蘆花。

星流水國夜然燈。月印江天明似鏡。隱顯無私位不該。依稀擬動成偏正。

芙蓉楷上堂。法身者理妙言玄。頓超終始之患。諸仁者。莫是幻身外別有法身麼。  
莫即幻身便是法身麼。若也恁麼會去。盡是依他作解。蒙昧兩岐。法眼未得通明。  
不見僧問夾山。如何是法身。山云法身無相。如何是法眼。山云法眼無瑕。所以道吾  
云。未有師在。忽有人問老僧。如何是法身。羊便乾處臥。如何是法眼。驢便濕處尿。  
更有人問作麼生是法身。買帽相頭。作麼生是法眼。坑坎堆阜。若點檢將來。夾山  
祇是學處不玄。如流俗閨閣裏物不能捨得。致使情關固閉識瑣難開。老僧今日若不當  
陽顯示。後學何以知歸。勸汝諸人不用求真。唯須息。諸見若盡。昏霧不生。自然智  
鑑洞明。更無他物。諸人還會麼。良久云。珠中有火君須信。休向天邊問太陽。

道合平常絕異端。行人何必歷艱難。從今莫信孫賾卜。龜殼無靈不用鑽。

保壽恩禪師上堂。拈拄杖云。得自天台絕比倫。從來無葉又無根。有時扶過斷橋  
水。幾度伴歸明月村。雖然如是。也不得無過。擊香臺一下便下座。

此樹不從天地生。登山涉水承渠力。如今擲向亂峯前。免致叢林為軌則。

保壽上堂。三界唯心。萬法唯識。檻外雲生。簷頭雨滴。澗水湛如藍。野花開似  
織。此時若不究根源。謾向當來問彌勒。還會麼。不勞久立。

靈然不涉古來今。三界都盧一點心。檻外桃花春蝶舞。門前楊柳曉鶯吟。

### 增輯丹霞淳禪師語錄(終)